

PAES

# R'arte de sì a ra caza, in Anpezo e inze chi outre paesc ladis

Par 'l ultimo mercui de ra cultura ladina de sto an, r'Ulda r'à vorù fei parlà i cazadore e contà stories, usanzas, struscies de 'na ota. Con el festide par un doman, che i viene da fora a me di ce e cemodo che 'l é da fei



El »Mercui de ra cultura ladina« de r'Ulda só a Socus, da ra Riserva de ra caza in Anpezo, con Stefania Zangrando, Denni Dorigo del Moro e Bruno Menardi Menego, par inparà algo de chesta storia de i nostre vece, ves el doman.



I cazadore de ra Riserva de Anpezo a ra sfilada de ra gran Festa de ra Bandes, par ra prima ota.

Canche i sia a ra caza, i nostre vece i inparaa a conosce ra so tera, i bosche, ra montes e ra crodes. Co i anes, chel saé i 'l a pasà a i pi soen, de jenerazion in jenerazion, e i a dià a fei cresce ra cultura de ra nostra sènte. Chesto se inpara, a lieése el libro »Ars venandi«.

La tradizione venatoria a Cortina d'Ampezzo, Colle Santa Lucia e Livinallongo del Col di Lana, scritto da Denni Dorigo, stanpà da 'l istitut cultural Ladin Cesa de Jan de Col de Santa Luzia, aduna co ra Unios ladines e co ra Riserves de ra caza, parecià par ra foula granda de ra Uncza, ra asoziazion de cazadore che ra s'è ciatà in Anpezo, el mes de sügn pasà.

De chesto s'è parlà ai 3 de setembre, par 'l ultimo de i »Mercui de ra cultura ladina« vorude anche sto an da ra Union de i Ladis de Anpezo. Sta ota ra sènte ra s'è ciatà a Socus, agnó che 'l é ra Riserva de Anpezo. S'è contà de ra storia de ra caza inze chesto paes, inze sta val, agnó che ra Riserva ra nasce del 1920, voruda dal comun, che el se poia su i paroi de i hotie; el prin presidente 'l é Romeo Manaigo Monego.

Inalora i cazadore, deboto dute hoteliere, i bete sode de i suoi par cronpà ra besties e res molà su ra nostra crodes, agnó che i melitare, chi anes de ra Prima guera, i aea copà duto, par magnà. Da inalora chesta asoziazion r'è fato un gran laoro par precurà chesta tera e r'è drio a 'l fei anche ancuoi.

Denni Dorigo 'l é el diretor de 'l istituto ladin Cesa de Jan, ma 'l é anche un cazador: par chesto 'l é scritto un gran bel libro, agnó che 'l à betù inze el so amor par r'arte de sì a ra caza, propio ra »Ars venandi«. Chel mercui 'l à contà che dinprin ra caza r'èa par poche, par i nobiles,

i sciore; dapò scomenza a sì anche chi outre. Chesta sènte r'è inparà un grun de robes, a sì par el bosco, su ra monte, soralduto a vardà ra besties, a studià.

»Se moe zentenera de otes, inze un an, par vardà; poca otes se v'è sbarà« – 'l à contà Dorigo. Coscità inze chel libro 'l é inze ra storia de ra nostra comunitas, che ra s'incroja co ra storia de ra caza. Se conta de ra riserves, de cemodo che 's v'è inaante, par ruà fin ancuoi, ves el doman. S'è dito che 'l é deboto algo de relijon, inze chesto sì a ra caza.

»L é stà difizile par i anpezane, ma anche par chi outre ladis, tegni dute chi outre cazadore fora da ra so riserva. Cisà cuante cazadore, da duta r'Italia, i aarae acao de vegni ca a sbaràca, intrà chesta bela crodes, inze ste bieci luoghe. I proa ben, da defora, a vegni a comandà su ra nostra riserves« – 'l à dito Dorigo.

Par ra riserva de Anpezo 'l à parlà el presidente Bruno Menardi Menego e 'pò Stefania Zangrando: »Par nos, chel che conta 'l é vive da cazador – r'è dito Zangrando – ignante de duto, inze el nosc natural 'l é ra voia de vardà, de i tende a chel che suzede. In Anpezo l'ouren aduna co ra Regoles, de spes nos a fei saé de algo che suzede. L é da vive ra nostra tera con rispetto: 'l é da sporse e da tuoi. Dal bosco se torna senpre con algo, anche se no se sbarà: se torna con algo de bel che s'è vedù, con 'na emozion, con bieci sentimente. El bel 'l é stà cete, canche se moe, anche de doi«.

Dapò Stefania r'è contà algo de ra storia: »Del 1920, canche 'l é nasciù ra riserva de Anpezo, s'è dito che par diesc ane no se sia a ra caza. Dapò s'è scomenzà a sbarà par zerne ra besties. Ancora ancuoi se sbarà par demanco de chel che se podarae;

se copa manco ciamorzes de cheres che sarae scritto«.

Denni Dorigo 'l à parlà de ra caza e de ra comunità, ma 'l à anche dito algo de ra usanzas, de chel che i fesc i cazadore, canche i v'è fora, pichese canche i ciapa 'na bestia, che r'è senpre da aè el rispetto e 'l onor de el cazador, drio un codice, agnó che 'l é inze anche cemodo se vesti, i sarvijs da bete, r'arma da dorà, cemodo se moe co ra machines.

Bruno Menego 'l à vorù lieése só 'l ultimo capitolo de chesto libro, agnó che se parla de ra sfides de doman: »Son drio a vive inze paesc con senpre manco sènte e senpre pi vecia, con poche soen. Un doman i ruarà da defora, par me di ce che on da fei: 'l é beleche i segnai che ra comunità ra no v'è pi adora a fei chel che ra vó, ma r'è sote tamei, co i foreste. Ra caza, conpain de ra comunità intiera, ra podarae padì duto chesto«. Dinultima i cazadore i à invidà dute a nafré de merenda e de beerela, inze el so ufizio, da zercà algo fato co ra besties ciapades da lore, aduna co i porziei de Salandro de Amedeo Bernardi Agnel.

Elsa Zardini Soriza r'è sarà coscità i »Mercui de ra cultura ladina« de sto an. Par el libro su ra caza, r'è dito che 'l é inze duto chel che 'l é drio a suzede a ra nostra comunità, agnó che dute stenta, ma tien duro: ra Ulda, 'l Istituto, ra Riserva de ra caza e outra istituzios e asoziazios: »Dute on ra politica via par sora, che ra me sofea. Suzede anche par ra Jeja«. Dapò Elsa r'è dito che sto an, par ra prima ota, 'l é a cazadore a ra gran Festa de ra Bandes e 'l é stà bel i vede. Inze ches'outra vales suzede de spes de vede i cazadore, benvorude inze ra so comunità. Sarae bel che chesto suzede anche in Anpezo.

MDM

RA FREGORES • RA FREGORES • RA FREGORES • RA FREGORES

## Fregores

Alcuanta noes in curto dal paes e da fora

### In viašo co r'Union de i Ladis d'Anpezo

De otobre se moe danoo co r'Ulda, sta ota ves ra Ungheria. Se v'è a vede ra zità de Budapest, che r'è i segne de 'na storia bela e granda, de chera nazion e de duta r'Europa. Se moe da Anpezo alolo bonora de lunes ai 13 de otobre; se rua a Budapest del dapò disnà, par vede ra parte noa de Pest, el stradon Andrassay, ra piazza de i Eroes, ra basilica de San Stefin. Da 'l indoman, martes ai 14 de otobre, se v'è a vede ra parte pi vecia de ra zità, su i coles de Buda, a man dreta de el Donau, agnó che 'l é el palazzo Real, ra vecia jeja gotica de Mattia Corvino, agnó che i à fato Franz Josef e ra so Sissi re e rejina de Ungheria; da ra piazza Santa Trinità se vede só ra zità e el Donau, agnó che se fajarà un sìro co ra barca, del dapò disnà. Da dasera se v'è a zena e 'pò a vede el museo etnografico. Mercui ai 15 de otobre se v'è a Visegrad, agnó che chel gran ru, strento intrà i coles, el volta in só, un luó agnó che 'l é pasà tropa storia de r'Ungheria, del Medioevo. Dapò disnà se moe par tornà ves Anpezo, agnó che se ruarà tarde da dasera. Par saé depi e se notà 'l é da pasà inze 'l ufizio de r'Ulda, sote ra Ciaša de Comun, da bonora daes 9 fin daes 11.30, i dis che 'l é daerto, dal lunes al vendres. Se pò anche scrie 'na mail a anpezo@ulda.it o ciamà i numere de telefonin 3381289181 e 3498968305.

### Torna el Desmonteà

I é drio a se parecià, e pareciave anche vos: sabeda ai 11 de otobre e domegna 12, in Anpezo se podarà vive danoo ra festa del Desmonteà. Se se ciata inze piazza, cemodo che s'è fato i anes pasade, par se pensà de chiste laore, che i à fato ra storia de ra sènte d'Anpezo e che ancuoi se fesc fadia a portà inaante. Del sabeda sarà ben da musica dal vivo, con alcuante grupe. Del domegna se vedarà ra sfilada par piazza de ra besties, vegnudes só da ra montes; se podarà cronpà algo al mercà; sarà i süoghe par i pize e par i grei. I é finamai drio a studià cemodo fei ra gara de el palo de ra cucagna. Mancìa un mes, ra setemane che vien se podarà saé algo depi e contà meo chel che se podarà vede e vive de otobre.

### Teatro par dute

I é drio a lourà, par se parecià polito e portà atore sul palco. Ra Filodramatica ra v'è inaante con »Na ota a scora«, che s'è vedù in piazza, par ra Festa de ra Bandes: ai 18 de setembre i sarà su a Vervei. I à anche chera de portà danoo in replica »Ci che no ousa, ra bocia pouasa«, che i à fato de ousciudà; 'l é da vede sei v'è adora a dorà 'l Alexander Girardi Hall, con duto chel rebalton ves ra Olimpiades. Da un teatro a chel outro: ra asoziazion Repeat r'è drio a portà in sìro par ra provinzia el so laoro »Come fratelli«, domegna 7 de setembre a San Vido, martes 23 in Comelego, a San Stefin. Ma pichese i à scomenzà a parecià un teatro par diesc anes de ra asoziazion, che i fajarà el 1 de noembre che vien. Lore i me disc che sarà algo de bel: nos speton, con ben da voia de i vede.

### Alošo par 456 poliziotte par ra Olimpiades

Ra Prefetura de Belun r'è drio a sì a vede de calchedun che i daghe alošo a i poliziotte, che i tociatàlourà ca in Anpezo, chi dis de ra Olimpiades e Paralimpiades d'inverno 2026. L é bišoin de 456 liete, che i see in Anpezo o inze i paesc pi pede, fin a un'ora de viašo. Chiste poliziotte i dromirà inze par 5 dis indrioman. Pò fei domanda i paroi de hotie o de outra ciases, agnó bete a dromi chesta parsones. Par fei duta ra cartes 'l é tempò fin daes 12 de martes ai 23 de setembre che vien.

### Par se pensà de Edoardo Gellner

Ra asoziazion che ra porta inaante el recordo e el laoro de 'l architeto Edoardo Gellner, coscità conosciù par i laore che 'l à fato in Anpezo e in Cadore, aduna co i so studie su ra ciáša anpezana, ra se ciata a ra fin del mes. Sabeda ai 27 de setembre i fajarà 'na ciacolada su »L'ego dell'architetto«, inze 'l hotel Boite, al vilajo Eni de Borcia. Domegna ai 28 de setembre se sirà a vede el vilajo, a moe da ra jeja, par ruà a ra colonia, agnó che i parlarà de el secondo libro de ra ciadena »Edoardo Gellner architeto«.

### Ra prima Copa de sto an

Ra Supercoppa italiana 2025 de hockey su ra jaza ra ruarà inze ra provinzia de Belun: chesto 'l é seguro, pacé che ra partita par chesto prin trofeo de ra stajon r'è intrà Cortina Hafro e Feltre. Se süia domegna ai 14 de setembre, daes 17, al stadio Olimpico e saà de seguro un grun de parsones a vede, parcé che ra squadra de Feltre ra ciama duta ra otes tropa sènte. L é da sperà che see anche ben de tifose de el Cortina, squadra che r'è inze soen de Anpezo e del Cadore. Dapò de chesta partita, el Cortina Hafro 'l à un'outra setemana par se parecià, da scomenzà el canpionato Alps hockey league e el canpionato talian Ihl Serie A: domegna ai 21 de setembre se v'è a süia a Meran, par 'na partita che val doa otes, par i doi canpionate. Ra prima in ciáša r'è sabeda ai 27 de setembre, canche rua i austriache da Kitzbühel.